

Nakhaie: Hasan dipecat kerana tidak diterima golongan liberal PAS
The Malaysian Insider
11 January , 2012
Oleh Syed Mu'az Syed Putra

KUALA LUMPUR, 11 Jan — Pemecatan Datuk Dr Hasan Ali daripada PAS disebabkan pengaruh golongan liberal dalam parti Islam tersebut, kata bekas pemimpinnya Datuk Nakhaie Ahmad.

Jelas bekas naib presiden PAS ini, perubahan pemikiran dan barisan kepimpinan baru yang dikuasai golongan liberal menyebabkan golongan ulama diketepikan.

"Punca pemecatan Hasan Ali adalah perubahan yang berlaku dalam PAS...PAS pada masa sekarang sudah banyak berubah yang mana dari segi pemikiran ia berubah ke arah pandangan yang liberal dan yang kedua adalah perubahan barisan kepimpinan, kalau dulu kepimpinan PAS adalah kepimpinan ulama tapi sekarang kepimpinan PAS dikuasai golongan liberal.

"Dahulu kepimpinan ulama dalam PAS banyak menyentuh tentang politik dalam kaitan dengan akidah dan sekarang sudah tentu pendekatan sekarang adalah bagaimana untuk memperoleh kuasa...dengan sebab itu maka aliran liberal begitu kelihatan dalam keputusan-keputusan yang dibuat," katanya kepada The Malaysian Insider.

Nakhaie menambah pandangan-pandangan yang dilontarkan bekas Pesuruhjaya PAS Selangor itu mewakili pandangan era kepimpinan ulama yang tidak boleh diterima barisan kepimpinan baru parti Islam pimpinan Datuk Seri Abdul Hadi Awang.

"Jadi pandangan Hasan Ali tidak serasi dengan kepimpinan baru dan pandangan yang mewakili zaman lama dianggap pandangan pengacau yang menghalang perubahan dan pendekatan liberal yang diikuti PAS sekarang.

"Dalam kepimpinan liberal, soal akidah memang jelas tidak diberi keutamaan, mereka sudah tidak memberi sokongan kepada isu akidah seolah-olah sudah luput zamannya," katanya.

Jelas beliau, golongan ulama dalam PAS juga akan menjadi "mangsa" seperti Hasan sekiranya mengeluarkan pandangan yang bertentangan dengan kepimpinan baru.

"Kalau tidak bersuara tindakan (dipecat) tidak akan dikenakan, tetapi kalau bersuara mempertahankan pendirian mereka seperti menegakkan negara Islam dan mempertahankan isu-isu akidah seperti mana Hasan Ali, mereka juga akan dipecat

"Daripada akidah ke liberal, dalam pendirian liberal persoalan akidah bukan menjadi hal utama kerana yang menjadi perhatian mereka adalah kuasa," katanya.

Hujung minggu lalu Hasan, Ahli Dewan Undangan Negeri (Adun) Gombak Setia telah dipecat keanggotaannya berkuatkuasa serta-merta kerana mengeluarkan kenyataan-kenyataan yang bertentangan dengan dasar parti.

Tindakan memecat Hasan dibuat berdasarkan Fasal 82(9) iaitu memecat keahlian sebagai ahli PAS.

Hasan sebelum ini seringkali mengeluarkan kenyataan yang "menongkah arus".

Keputusan memecat Hasan dibuat sebulat suara dalam mesyuarat jawatankuasa kerja PAS pusat.

The Malaysian Insider

Hakcipta© 2012 The Malaysian Insider

Source: <http://www.themalaysianinsider.com/bahasa/article/nakhaie-hasan-dipecat-kerana-tidak-diterima-golongan-liberal-pas/>